



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Rohan Bopanna asaya nungi
anisungzükba sangdongogo

Hassan-i Tanzania Tir election
akokba sangdongogo

VOL. XXIII ISSUE NO. 26 (ADOK 26) DIMAPUR AMUNGNÜ (SUNDAY) YIMPOKSÜI (NOVEMBER) 02, 2025

₹ 5.00

Tematiba takok angur kaketshirtem nem 'Mayangnokcha Award' agütsü



Mayangnokcha Award Trust nung züngsemtem den Wt.Aotula T.Imchen IPS (kaketshirtem den mena alilaji) aser 2025 küm NBSE ajanga agiba HSLC tatidang nung tematiba takok jenjang angurtem den parnok tsüraburtem aser Holy Cross HSS nung principal Fr. R.N.Odyuo nungertem noksa nung angur. (Dimapur, Nov.01, 2025).

Dimapur, November 01 (TYO) : Nagaland Board of School Education kübok aliba school-tem nungi küm shia class 10 nung tematiba takok angurtem nem MAT konang senpet agütsüba sentong ka, 2025 küm asoshi tanü yangi Holy Cross Higher Secondary School, Dimapur nung Mayangnokcha Award Trust (MAT) purtemi ayongzüka agiogo.

Tanü agiba sentong ya Nagaland nungi Naga nunger

kaketshirtem rongnung NBSE ajanga agiba class 10 tatidang nung tematiba takok jenjang angurtem nem konang senpet agütsüba 32 buba sentong liasü. 2025 küm iba konang senpet angurtem rongnung tematiba takok jenjang angulaji St.Paul Hr.Secondary School, Dimapur nungi Lungyihangle Nring liasü. La ya Maths subject nunga topper liasü, anungji overall topper senpet den külemi ano Education Forum of

Mokokchungi Maths subject topper atema renemtsüba senpeta laisa agizük.

Iba denji Ao subject nung 2025 küm class ter tatidang nung takok angurtem ajak rongnung mark teimtiba angulaji Queen Mary Hr.Secondary School, Mokokchung nungi Sunepbenla Imchen liasü. Iba senpet ya Rockdale Club, Mokokchungi agütsü. Ano, Social Science subject nung topper jenjang angulaji Patkai Hr.Secondary School, Chümoukedima nungi Renbeni Odyuo liasü aser iba senpet ya Youth Resources and Sports Department-i agütsü. Iba denji ano, kasa küm kasa tatidang nung Science subject nung topper jenjang angusangji

Fernwood School, Kohima nungi Moasanen Pongener liasü aser iba senpet ya Tir Yimyim-i agüja arur. Ano, English subject nung topper jenjang angurji Little Garden School, Tuli nungi Limsen Imsong liasü aser iba senpet ya C-Edge College, Dimapuri agütsü. Ano, Agriculture subject nung tamatiba takok angurji Northfield, Kohima nungi Medovinuo Semou liasü. Iba senpet ya Lenjeter osangkaketi agütsü. Iba konang senpet rongnung tematiba takok jenjang angur nem MAT-i sen Rs.25,000 den nungo aser kuli kaketsür aser tanga subject topper-tem shiaji senpet sen Rs.5000 den nungo aser kuli kaketsür.

Tanü iba sentong nung tongti tejaoker Wt.Aotula Imchen, IPS, Commissioner of Police, Dimapur-i kaketshirtem ayongzüka jembidang, takok tajung anguba asoshi nisungtem nungi konang nünsang anguba yagi ano tali temerangba inyaksüsa akümer, kechiyong nisungtemi takok angurtem dak nungi tarutsü ung teyari tajung angutsü imlar ta metetdaksü.

Laisa kaketshirtem dang , takok tajung nguaka taküm nung jakla yimya mazioktetra, asen takok jenjangji maka akümtsü, anungji mapa ajak nung peisasa azüoka ochishia aser Tsüngrem tsüba indangindanga alitsü nungdakba indang lemsatop.

(Maneni tapak 2 nung...)

JCC-i Nagaland sorkar kulitem aitsür

Dimapur, November 1, 2025 (TYO): Nagaland sorkari Indian Administrative Service (IAS) nung non-State Civil Service (SCS) officers aniokba inakyim pusema nungitba aitsür ta Joint Coordination Committee (JCC)-i metetdaksüogo.

Ketdangpurtemi IAS nung aniokba ya constitutional framework sasep nung aser nendaka aser mapang talangka inyaka aruba 'regularised officers' aniok ta government spokesperson-i ashiba magizüker ta JCC-i ashi.

"Tim masüleni shimba ketdangsürtem service nung aniokba ya Constitution of India nung Arlla 14 aser 16 alema inyakba lir anungji kodaser non-State Civil Service (SCS) ketdangsürtem IAS nung aniokbaji constitutional framework nung aliba ama inyak ta shiteter?" ta JCC-i asungdangogo.

Supreme Court-i 2006 küm obendang tulu ka agüja lir aser ibaji Uma Devi versus State of

Karnataka ken o atema lir. Tim masülen agi shimokertem regularization asüba ajanga parnok mapa nung tim mesüi shimokba memetongshir ta Supreme Court-i obendang agütsüba JCC-i nenshia ashi.

Mapa meranga aser tebilemtsü khuret bena inyakba ketdangsürtem competitive examinations majangi jenjang temabai ajungkettsü akok ta sorkari ashir saka JCC-i ibaji magizükba metetdaksüogo.

Rajasthan asoshi Supreme Court-i obendang ka agütsüba nung non-SCS officer ka shimokba metenja lir ta sorkari ashi. Ajisüaka Rajasthan ken o ya non-SCS officers atema reserved seats dak sendakba liasü saka Nagaland indang ken o yabo tim mesüi shimba ketdangsürtem induction panel nung dendaksüba indang lir ta JCC-isa jangjashitsüogo.

Nagaland sorkari backdoor ajanga shimertem kecha tai mali ta metenja metushitsüla" ta JCC-isa metetdaksü.

Pradyot-i North East alliance alitsü ayongzüker

Agartala, November 1, 2025 (Agencies): North East nung regional parties külem sabang ka tentettsü sentong lir aser iba atema kobi melii osang sangoktsütsü ta Tipra Motha Party founder Pradyot Kishore Manikya Debbarma-i ashi.

"Asenok kati ka den raratepba anener asen nübortem asoshi ola ka kübok longjemra Centre-i asenok süoki ia agizüktsü. Yamaji mesüra asenok lemsar dang alitsü aser North

Eastern state ka danga kecha majangzüktsü" ta Pradyot-i ashi.

"Northeast longjemtsü aser national decision-making nung state tilatem ola angashidaksütsü atema iba mapa inyaksü. Asenok külemi longjemra asenoki khuret aika kokteta aotsü. Asenok melongjemra parnoki asenok tsüngda telemasa adokdaksütsü" ta paisa metetdaksü.

(Maneni tapak 2 nung...)

AKMWC-i Kohima nung Forensic Science Laboratory meshir

Dimapur, November 1, 2025 (TYO): Association of Kohima Municipal Wards Council (AKMWC)-i Nagaland Forensic Science Laboratory Dimapur nung mapa tajungba inyaksü aser Kohima nung FSL tasen ka amenoktsü mesüra taoba Kohima FSL asentenshia lapoktsü metetdaksüogo.

Kohima nung alirtemi akhangba ama meinyakra onoki meratem agia aotsü ta AKMWC-i Home Commissioner Nagaland, Kohima dangi shidi ka zülüogo.

October 25, 2025 nü Old

Ministers Hill Colony, Kohima nung aiür V. Zao tepseter lia anguba sülen police nem anepdang 7:00 tashi nung osang sangoktsü, ajisüaka FSL Dimapur nungi forensic personnel nikongdang 2:00 ako süir ang Crime Scene Examination atema tonga aru. Kohima nung Forensic Science Laboratory maliba ajanga asür kinungertem, medemertem aser kiyongertem ghonda 7 tema timtema atatsüsa aküm ta AKMWC-i shidi nung shia lir.

Ozüng alema inyakdak forensic science ajanga

tongtipang shilem agir aser okadak agütsütetsüsa kulitem nguteter. Ajisüaka Kohima nung ibala facilities aser personnel maliba ajanga aiben ozüng amertemi kecha mesüteter aser takoksa angurtem aser loktiliba nem temeten magütsüteter mesüra menur ang agütsür, ta parnokisa ashi.

AKMWC-i iba tebilemtsü atema ola madoki meliteter anungji tekaraba nung item mapa inyaksü akhanger ta President Thejao Sekhose aser General Secretary Hukato Chishi nati shidi nung shia lir.

CM Rio aser Dy. CM Zeliang nati NH yanglushiba reprangdang

Dimapur, November 1, 2025 (TYO): Chief Minister Dr. Neiphiu Rio aser Deputy Chief Minister & National Highways in charge TR Zeliang nati November 1, 2025 nü Jotsoma yimtsüng kübok National Highway yanglushiba maparen reprangdangogo.

Tanü tenati Kezanu aser Liezocho nung lenmang yanglushiba semdang aser idangji Executive Engineer PWD (NH) Bendang-i iba mapatong indang osang lemsatop.

Tawa anentsüh alubaji ayongnu ka ajanga liasü aser iba den külemi ano ayongnu ana tangaleni belenogo. Item ayong tilatem ya reinforced concrete (RCC) box drainage system ka nung dang yimokdaksür ta Executive Engineer PWD (NH)-isa ashi.

Tang tashi nung gabion wall, earth cutting, aser surface stabilization maparen shitak inyaka arudar aser kobi melii garitem senzütetstü ta paisa ashi.

Chief Minister Rio-ia tarutsü

nung anentsüh malutsü atema slope protection aser drainage systems shitak yanglutsü tebilembatem lemsatop.

Paisa engineers aser contractors dang mapa tajungtiba nung inyaksü aser senzüsenbongertem tiptema senzütsüsa lenmang yanglutsü ayongzük.

Iba mapang Kohima Deputy Commissioner B. Henok Buchem, Revenue Officer Kevingoto Kulnu aser tanga department ketdangsürtem liasü.

WENN-i ayongzüka Business Governance Workshop agi



Dimapur, Yimpoksüi/November 1 (TYO): Women Entrepreneurs Network Nagaland (WENN) aser Small Industries Development Bank of India (SIDBI) na longjemer Mon aser Mokokchung district nung October 28 aser 30 nü tetsür entrepreneur tem atema Business Governance Workshop ayongzüka agiogo.

Nagaland kübok tesem balala nung entrepreneurial capacity tashi itshidaktsüsü atema district sasap nung inyakyim benoka inyakba nung

shilem ka ama item workshop tem ayongzüka agiogo.

Workshop agiba mapang, sentong nung shilem agirtem nem trade licensing, FSSAI certification, Udyam registration, financial literacy aser sorkar scheme balala dak sendakba nung tangazükba agütsüogo.

Iba workshop ya regulatory inyakyim tem tezübaba kümdaktsüsü aser tetsürtem parnok shishilemba tajungba kümdaktsüsü aser formal kümdaktsüsü asoshi

tenüngdakba hadirtem agütsüsü atema ayongzüka agiogo.

Sentong nung tetsür entrepreneur temi kanga jangrabangra shilem agiogo, aser iba ajanga state nung tetsürtemi aniba enterprise tem renloka aoba sayur.

Nagaland nung tetsür entrepreneur tem ajungkettsü atema WENN bendanga agütsür lir. Training aser awareness sentong balala ayongzüka kaja parnoki maneni tetsürtem nem tashi agütsüdar.

Child Rights & Child Protection dak sendakba nung awareness sentong agi

Dimapur, Yimpoksüi/November 1 (TYO): Nagaland State Commission for Protection of Child Rights (NSCPCR) aser Office of the Commissioner of Police, Dimapur na longjemer anogo ka atema "Child Rights & Child Protection" dak sendakba nung awareness sentong ka October 31 nü Dimapur Commissioner office Conference Hall nung agiogo.

Sentong nung o jembiba mapang NSCPCR, NCS RTD mendenbuba Alung Hangsingh-i, Niuland, Chumoukedima aser Dimapur ya cosmopolitan jila lir, kong sobaliba temeyoktep lir aser technology renloka aoba mapang ka nung inyakyimtem tebenjaba kümogo, aser police officer tem shirnoki temzüng ozüng dak ajemdaker child abuse aser timtem nung aliba tanurtem ken o tem achaayanger parnok atema talisa kanga tasak kümogo, ta ashi.

Police officer ka ama parnoki IPC, CRPC kanga junga meteta alitsüla, saka POSCO Act mesüra JJ Act dak sendakba nung inyakyim kar lir koba ozüng raksartem den inyaksangshiba dang nungi tera balala, ta pai ashi. Alung-isa, technology renloka aoba den osangtsüsang kanga kara prokshia aor anungji iba amala ken o achaayangba mapang kanga kümdanga inyaksangshitsü kanga

tongtibang kümogo, ta ashi. Tanurtem ya linük tongtoret ta shia, pai tanurtem ya linük tongtoret kümdaktsüsü asoshi nükjidong yur aliba tongdaktsüsü atema asenoki koba tashi jenjang agir ta pai asüngdang.

Anungji policing aser police officer tem shilem kanga tongtibang kümogo aser parnok aküm ajanga tanurtem nem tekümzüka agütsür. Iba amala sentongtem ayongzüka state nung kinükisang ajak tonga aotsü Commission-i merangdar ta shia pai, SP office, Kohima nungi tenzüka tang ashi tasembenbuba police officer tem den ajuruteper ta ashi. Maneni pai, iba sensaksem ajanga police officer temi langkabosa angazüksü imlaba lemsatepa liasü.

Sentong nungsa DCP, HQ, Ruth Murru, NPS-i o jembiba mapang, iba amala awareness sentong tajung ayongzüka katsüba atema Commission dang kanga pelaba lemsatep. Lai ashiba agi, temzüng ozüng kwi ka yanglur liaka aser lokti tentet kwika tenteter liaka ozüng ji memettdaktsüra ajak amajok dang. Anungji Lai iba amala awareness sentong ya temzüng ozüngtem aser lokti tentettem inyaksangshi tajungba kümdaktsüsü atema kanga tongtibang lir ta ashi.

Dimapur police-i temesepba mozü apu



Dimapur, Yimpoksüi/November 1 (TYO): 30/10/25 nü Dimapur Police-i Heroin (Shanflower) asütsü ta temulung melemi bilemba temesepba mozü grams 230 shi soap cases 18 nung sepa bener lia gari ka nungi ngutetogo. Iba gari ya hit-and run ken o ka nung densema liasü.

Wagon-R (Regdt No-AS07P5457) gari kati Tragopan police Point, Dimapur nung Bolero ka dak

tsüker Khatkahti, Assam leni jena ao. Iba sülen meita aoba sentong ka tenzük aser Khatkati Police Station Officer-In-Charge nem iba Wagon-R ya meita atatsü atema osang agüja liasü.

Kasa anogo 15:20 ako shi nung Wagon-R gari ya Khatkati nung amendaker lia angu aser Tragopan Police Point-i spot verification atema atsür oa liasü.

Spot verification sülen gari

ya lapoka tenük kuli agütsütsüpurtem matsüngdang kanga junga bushia liasü. Gari lapoka asadangba mapang temesepba mozü ya gari telung nung miim bener lia nguteta liasü.

Iba dak sendakba nung East Police Station nung ken o ka benokogo aser tang bushisüngdang tesüdak lir, ta Dy. Commissioner of Police (Crime)/Pro sangdong ka ajanga metetdaktsü.

State EC-i PTC kübok Ward-11 result metetdaktsü

Dimapur, Yimpoksüi/November 1 (TYO): Pfutsero Town Council kübok Ward 11 (Zhipa) indang election results October 31 nü sangdongogo. Iba election ya October 28 nü agia liasü.

Election nung toktepba Independent candidate ana rongnung Krokulo Khutso-i vote 315 (54.40%) angu aser Tewu Mero-i vote 264 (45.59%) ngua liasü. Iba election ya Krokulo Khutso-i vote 51 agi akok. Vote 594 agütsüba nung vote 579 valid aser vote 15 invalid liasü.

Election nung shilem agiba voter 87.09% (594) rongnungi

tebur voter 48.48% (288) aser ttsür voter 51.51% (306) liasü. Iba election nung tebur dang nungi tetsür voter timba liasü.

Arishi küm tasazük dak sendakba nung voter 21.11% (144) arishi küm 18 nungi 25 tsüngda alirtem liasü, 35.7% (244) küm 20 nungi 40, 24% (163) küm 41 nungi 60, 5.8% (40) küm 61 nungi 80 aser voter 0.4% (3) arishi küm 80 temapur liasü.

Iba election kecha tetsükdaktsü makai anep anepa aser yimjung nung takok ngua agitetba atema State Election Commission-i election inyakyim

dak sendaka aliba ketdangsürtem nem parnoki bendanga agüja inyakba atema tenüngsang agütsü, aser electors, lokti tentet aser state sorkari teka amteper inyakba atema pelaba lemsatepa liasü.

Kasa mapang State Election Commission-isa, Ward-11 (Zhipa) Bye-Election result sangdonga election inyakyim tembangba sülen, Model Code of Conduct koba Pfutsero Town Council area nung Election atema osang agütsüba anogo nungi benoka liasü iba ya October 31 nü ayaterem nungi aginba metetdaktsüogo.

Tematiba takok angur...

(Tapak 1 nungi...)



2025 küm NBSE ajanga agiba HSLC tatidang nung takok angurtem rongnung Science subject nung mark teimtiba angusang Moasanen Pongener ket nung MAT-TYY Award amer Tir Yimyim yimozülur den agiba noksa ka yangi angur. (Dimapur, Nov.01, 2025).

Tanü putu lanurtem ya sobaliba nung tera yanga alitsüla aser temetetba nung peisasa rajema inyaktetba taküm ka asütsüla ta laisa shisem. Takok ta asüba ya tangar yaritetsüsa aliba dang ajar, aser asenok dang nungi nübortemi aji imla, ta Wt. Aotula T Imchenisa metetdaktsü.

Iba kasa sentong nung MAT tenüng nung, Er.Moa Aieri jembidang, tatidang nung tematiba takok angurtemjiang tokolok techira aser tajung ta masü saka parnok ajakji tajung dang lir, saka parnokji tajung nung toktepdaaktsüsü atema tematiba takok angurtem nem dang iba konang ya agütsür ta ashi.

Joko, tanübo kechisarina ajak technology agi inyakba putu

asünungji, Science azüngtsüba ya kanga nüngdaka kümogo ta paisa ajungshi. Nagaland nunga school-tem kiojen aser tesayuba nung 'Quality Assessment' tenzüksü mapang arudagi, anungji aji meteta school-tem tajungba akümtsü sentong tenzüksüla ta paisa ayongzüük.

Tanü iba sentong nung Major 4 teloki MAT naklu ken aten aser Holy Cross School kaketshirtemia ken tajung ka tena shilem agi. Iba sentong tenzüka Holy Cross Hr.Secondary School nung principal Fr.Renthungo N Odyou-i sarasadem aser DABA sannüker Imnatoshi Longkumeri sarasadema tembang. Iba sentong lenir Ratna Paul aser Ilo to Yephthomi na liasü.

Pradyot-i North East alliance...

(TAPAK 1 NUNGI...)

"Bangladesh tensa ajanga India kübok eastern borders nung timtem bentsür arutsü. Chittagong Hill Tracts nung Pakistani military ketdangsürtem anena lir ta osang angazüker. Parnokji medical aid atema aruba ta ashir saka medical aid atema Brigadiers mesüra Generals masü saka doctor tem ang arutsü" ta Pradyot-isa ashi.

"Taruba Bangladeshi election nung "anti-India" sorkar ka akümtsü aser iba ajanga Assam,

Meghalaya, aser Tripura amala state tem nung tensa raksatsü. Parnoki kiralongraba, tesempateper aser lokti nung meputep adoktsüba mapatem inyaktsü" ta paisa tekümdangtsü olen ka ashi.

"Political party tem tsüngda tetoktepba anenang. CPIM, BJP, aser Tipra Motha ta asübaji tongtipang masü saka asen nübortem kümzüka ayutsübaji tongtipangba. Politics jenjang ajungba dang nungibo national

security tuluba lir. Bangladesh ya India asoshi medemer ka masü" ta Tipra Motha founder-isa ashi.

"Tripura nung taila Bangladeshi ID cards amshia tatalokba kar ajurubaji Northeast region raksatsüsü atema tasa tulu ka atonga inyakba nung shilem tila ka dang lir. Parnoki mapa tuluba inyaktsü anungji kin ajak kümküma aser longjemer alitsü ayongzüker" ta Pradyot Debbarma-isa metetdaktsüogo.

Andhra Pradesh nung tekülem kidang nisung 9 ajemset

Vijayada, November 01 (Agencies): Honibarnep Andhra Pradesh nung Srikakulam district kübok Kasibugga nung aliba Venkateswara Swamy tekülem kidang lokti nungtepdang nisung 9 ajemset aser nisung 25 dak tali yiruogo.

Iba lendong nung asürtemji tebur chanu ka den tetsür ti liasü.

Iba tekülem kidangji talisa Honibar anogotem nung nisung 3,000 dak tali adenshir, ajisüaka November 1 nübo Ekadashi anogo asüba agi (Hindu nunger temeshi anogotem rongnung ka) nisung 10,000 dak tali adenshia liasü.

Ekadashi anogo nungji tamangertemi lumir aser Vishnu Tsüngrem külema sarasademer.

Iba lendong nung yirurtemji anasa aliba hospital balalai anir ao. Yirua alirtem rongnung karbo kanga mejungi alir, anungji asürtemji iba dang nungjagi teimba akümtsüa akok, ta ketdangsertemi metetdaksü. Kasibugga nung aliba tekülem ki ya nija tekülem ki ka lir aser endowments department kübok register süa mali. Iba dak alia tekülem ki ketdangsertem aser sentong ayongzükertemi lokti adenshitsü atema jelia temelaba memeshi.

Osangbener den jembidang Srikakulam district police tongti, KV Maheswara Reddy-i, "Nisung kari ayazüka aoba kikümbanglen nungi ayaketa atuba ajanga iba lendong ya atalok," ta metetdaksü.

Paisa, "Iba tekülem ki ya mezüngbuba 'floor' nung lir aser iba floor atongsü atema step 20 shi atur. Step atubaji junga meyanglu, ibayongji chirepa nisung ka tsük. Iba mapang nungji tangartem aoksatepa jenshiba ajanga iba lendong atalok. Iba lendong atalokba ya tekülem ki ketdangsertem aibelen ajanga lir.



November 01, 2025 nü Begusarai district nung Congress MP, Priyanka Gandhi Vadra-i Bihar Assembly election nüboyim senden ka nung jembidang tangokba noksa nung angur.

Asüngdangyatsü atema tekülem ki ketdangser karbo anir ogo," ta metetdaksü.

Iba osang angashia Chief minister N Chandrababu Naidu-i X ajanga, "Srikakulam district kübok Kasibugga nung aliba Venkateswara tekülem kidang lendong atalokba osang angashia aoksar. Iba lendong nung tamangertem asüba osang angashia jashir. Ni ketdangsertem dang yirua alirtem nem akokba tashi medical teyari tajungtiba agüjang ta tuyuogo," ta metetdaksü.

Ato kilonser Narendra Modi-ia mangyim jashi lemsatepba den külemi iba lendong nung asür kibong shia nem senotsü teyari lakh anana aser yirua alir shia nem sen 50,000 teyari agütsütsü ta sangdong.



November 01, 2025 nü Nava Raipur Atal Nagar, Chhattisgarh nung Ato kilonser, Narendra Modi-i Chhattisgarh Legislative Assembly building tasenba semzüksüdang tangokba noksa nung angur.

Kanga sensak tia agienba mezüngbuba state ji Kerala kümogo

New Delhi, Yimpoksüi/ November 01 (Agencies): November 1, 2025 nü Kerala Chief Minister, Pinarayi Vijayan-i, Kerala ya kanga sensak tia maliba state ka kümogo, ta sangdongogo.

India nung kanga sensak tia agienba mezüngbuba state ji Kerala asütsü.

Kerala state tentetba anogomong nüngtem nung state assembly nung temeja senden ka ayongzüka amenba mapang nung Chief Minister-i iba sangdong metetdaksü.

Vijayan-i, taküm Kerala Piravi ya Kerala atema putu tasen ka asoba küm lir, ta ashi.

Paisa, state nung kanga sensak tia agientsü atema tesüiba küm pezü tashi inyaksangshia aruba osang tejangja metetdaksü.

Iba senden nungji Opposition United

Democratic Front (UDF) bo maden aser Rule 300 kübok Chief Minister-i sangdong ka agütsütsü atema temeja senden ayongzükbaji aija liasü.

State Assembly nung Opposition lenir, V D Satheesan-i, "Chief Minister-i rule 300 kübok sangdong agütsüba ya tashioktsüba lir aser House rules mezüngmeshiba lir. Anungji onoki iba nungji madentsü aser shilem magitsü," ta metetdaksü.

Iba sülen opposition züngsemtemi yimyim ayima senden nungi ayazüka alu.

Ajisüaka Vijayan-i, 2021 küm Left Democratic Front (LDF) mezüngbuba cabinet senden nung Extreme Poverty Alleviation Project (EPEP) atema telemtetba agia liasü, ta ashi.

"Onoki takoktsü dang nangzüker aser onoki nangzükbaba ama ataloktsüogo," ta pai ashi.

"Kanga sensak tia agientsü atema United Nations-i latettsüba Sustainable Development Index kübok Kerala state-i kanga junga inyaktetogo. Nüburtem

taküm jenjang tajungba kümdaktsüba tsütsü asen state ya laboratory ka kümogo. Kanga sensak tia agientsü atema inyaksangshiba tsütsü linük nung tanga state temi asenok dang nungi tatishitsü agitsü. Nüma atangtsüsa iba alizüng tongtetba ya Kerala nunger ajaki inyaktetba lir. Iba ya puti otsü yangluba mapang ka," ta Chief Minister-i metetdaksü. Vijayan-isa, iba scheme benoka inyakdang state sorkari sen crore 1,000 dak tali indokogo, ta metetdaksü.

FORM NO. 14
[See Regulation 33(2)]
OFFICE OF THE RECOVERY OFFICER- I/II
DEBTS RECOVERY TRIBUNAL, GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE
Recovery of Debts & Bankruptcy Act, 1993 nung Sections 25 nungi 28 tashi aser Income Tax Act, 1961 nung Second Schedule kübok Rule 2 nung ajemdaker notice agütsür.
RC / 364 / 2023
CANARA BANK
-Versus-
MR. BEN^DANGANS^HI AND ANOTHER

To,
(CD 1) MR. BENDANGANS^HI, K. Kire Colony, Half Nagarjan, Near Yimchugner Church, Dimapur, Nagaland- 797112.
(CD 2) MR. LANUCHUBA, C/o Sr. Automobile Engineer, Nagaland State Transport, Dimapur, Nagaland- 797112.

OA/188/2022 nung nung ajemdaker DEBTS RECOVERY TRIBUNAL, GUWAHATI nung Presiding Officer-i tuyuba ama Recovery Certificate nung ajemdaker iba sangdong agütsür, **Rs. 80,78,388.69 (Rupees Eighty Lakh Seventy Eight Thousand Three Hundred Eighty Eight and Paise Sixty Nine only)** den pendentellite aser **01.05.2022** anogo nungi tenzüka sentsüh mouma tashi future interest @ 12 % Compound Interest Monthly aser costs **Rs. 83,255/- (Rupees Eighty Three Thousand Two Hundred Fifty Five only)** na anema lir (Jointly and Severally / Fully / Limited) ta sangdonger.

(1) Amount due as per the Recovery Certificate: Rs. 80,78,388.69
(2) Interest from 01.05.2022 to 28.02.2024 @ 12.00% Rs. 17,74,146.95
(3) Costs Rs. 83,255.00
Total:- Rs. 99,35,790.64
Recovery (-) Rs. 00.00
Rs. 99,35,790.64

2. Osangkaket nung iba sangdong agütsüba sülen anogo 15 tsünga temalen shia aliba sentsühji agüjang ta nü dang tuyur, mesüra Recovery of Debts Due to Banks aser Financial Institutions Act, 1993 den Rules nung ajemdaker sentsüh alangzüksü atema inyaktsü.
3. Nü dang taruba ken o mangadangdangsa affidavit ka nung nü kiojen sangdongang ta tuyur.
4. Maneni ken o angadangtsü atema **24.12.2025** anogo nung anepdang 10:30 ako tashi nung tsünglangen sign süa alir matsüngdangi arung ta tuyur.
5. Temalen shia aliba senotsü denji külemi nai item ya-a agütsütsüa akümtsü:
(a) Iba certificate notice agütsüba/ execution proceedings mapang nungi tenzüka interests.
(b) Iba notice aser warrant agütsüdang indokba costs, charges aser expenses, iba dak alia sentsüh alangzüksü atema inyaksangshidang indokba ajak agütsütsü.
08.10.2025 anogo nung kü meyongnem aser Tribunal seal agütsür.
RECOVERY OFFICER- II
DEBTS RECOVERY TRIBUNAL, GUWAHATI

FORM NO. 14
[See Regulation 33(2)]
OFFICE OF THE RECOVERY OFFICER- I/II
DEBTS RECOVERY TRIBUNAL, GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE
Recovery of Debts & Bankruptcy Act, 1993 nung Sections 25 nungi 28 tashi aser Income Tax Act, 1961 nung Second Schedule kübok Rule 2 nung ajemdaker notice agütsür.
RC / 324 / 2024
CANARA BANK
-Versus-
M/S. GOLDEN D LITE RESTAURANT AND OTHERS

To,
(CD 1) M/S. GOLDEN D LITE RESTAURANT, Proprietor Firm of Mrs. Sushma Sharma, W/o Sri Vijay Sharma, C/o Golden Palace, Circular Road, Dimapur, Nagaland- 797112.
(CD 2) MRS. SUSHMA SHARMA, W/o Sri Vijay Sharma, R/o Fellowship Colony, Circular Road, Dimapur- 797112, Nagaland.
(CD 3) SRI VIJAY SHARMA, S/o Banarsilal Sharma, R/o Fellowship Colony, Circular Road, Dimapur- 797112, Nagaland.

OA/248/2022 nung ajemdaker DEBTS RECOVERY TRIBUNAL, GUWAHATI nung Presiding Officer-i tuyuba ama Recovery Certificate nung ajemdaker iba sangdong agütsür, sentsüh **Rs. 1,37,38,059.00 (Rupees One Crore Thirty Seven Lakh Thirty Eight Thousand Fifty Nine only)** den pendentellite aser 01.06.2022 anogo nungi tenzüka sentsüh mouma tashi future interest @ 15.50 % Compound Interest Monthly aser costs **Rs. 1,40,255/- (Rupees One Lakh Forty Thousand Two Hundred Fifty Five only)** na anema lir (Jointly and Severally / Fully / Limited) ta sangdonger.

(1) Amount due as per the Recovery Certificate: Rs.1,37,38,059.00
(2) Interest from 01.06.2022 to 05.12.2024 @ 15.50 % Rs. 53,55,584.70
(3) Costs Rs. 1,40,255.00
Total:- Rs.1,92,33,898.70
Recovery (-) Rs. 00.00
Rs.1,92,33,898.70

2. Osangkaket nung iba sangdong agütsüba sülen anogo 15 tsünga temalen shia aliba sentsühji agüjang ta nü dang tuyur, mesüra Recovery of Debts Due to Banks aser Financial Institutions Act, 1993 den Rules nung ajemdaker sentsüh alangzüksü atema inyaktsü.
3. Nü dang taruba ken o mangadangdangsa affidavit ka nung nü kiojen sangdongang ta tuyur.
4. Maneni ken o angadangtsü atema **30.12.2025** anogo nung anepdang 10:30 ako tashi nung tsünglangen sign süa alir matsüngdangi arung ta tuyur.
5. Temalen shia aliba senotsü denji külemi nai item ya-a agütsütsüa akümtsü:
(a) Iba certificate notice agütsüba/ execution proceedings mapang nungi tenzüka interests.
(b) Iba notice aser warrant agütsüdang indokba costs, charges aser expenses, iba dak alia sentsüh alangzüksü atema inyaksangshidang indokba ajak agütsütsü.
13.10.2025 anogo nung kü meyongnem aser Tribunal seal agütsür.
RECOVERY OFFICER- II
DEBTS RECOVERY TRIBUNAL, GUWAHATI



TIR YIMYIM YIMOBILEM (EDITRIAL)

DIMAPUR SUNDAY, NOVEMBER (YIMPOKSÜI) 02, 2025

Yimsüsür aser ketdangsertem

Alima nung Tsüngremi alakteta shimba Israel nunger yimten yimsüsübaren yabo kenyongi tangar kintem dang nungi balaka asütsüba liasü. Tangar alima kin shia madak yimsüsütsü asoshi chuba mesüra yimsüsürtem lir, saka Israel yimli madakbo Tsüngremi dang yimsü süa liasü. Israel nunger atema chuba mesüra prime minister-ji Tsüngrem asütsüba liasü. Ajisüka, Israel nungertemi parnok madak Tsüngremi yimsüsüba yimliji maginüi aküm. Parnoki tangar alima kintem ama, Tsüngrem dang nungibo nisungi yimsü asübajiang tajungba asütsü amai bilem. Anungji, kenü anogo Israel nunger tamburtem ajak senteper Samuel dang tangar kintem ama parnok madak yimsüsütsü aser obendangtsü asoshi chuba ka meshi. Iba o jagi Samuel mepeladaksü, anungji pai Kibuba dang sarasadem. Atangji, Israel nungertemi Samuel dang parnok madak obendangtsü atema chuba ka meshiba kuliji nisung tsüngdangbo au ta asütsüsa kuli ka liasü. Joko, Samuel tambur akümer aser pa melentsüsa par chirnur kata mali, ajak samesa nisung dang liasü. Anungji, Samuel masüdangsa parnok Samuel melena parnok madak obendangtsü asoshi chuba ka shimtsübaji kanga rongdak nüngdaksa bilem. Tetezü, Israel nungertemi Tsüngremi parnok nem ano Samuel melen obendanger tajung ka agütsütsü ta mamang. Anogo shia, Israel nunger kija, kibong, lokti aser yimten nüngdak ajak atalokdakja Tsüngremi yarir ser nung, ashiko parnok ibaji mereprangtet südi. Aji oda, tsükchirtem ajak madak takok agüja aniba Tsüngrem kübok alitsü melen, alima chuba kübokang alitsü Israel nungertemi mulungtet. Kodang Samuelli Israel nunger tamburtem o nung mepelai Tsüngrem dang sarasadem, Tsüngremi Samuel mulung sünepja ashi, " parnok ashibaji angang, kechiaser parnok na magizük masü saka ni parnok madak chuba asütsü parnok magizük." (1 Samuel 8:7) Tanü asenoki Israel nungertemi Tsüngrem melen nisung chuba südaktsütsü mulungtetba tamashi mapaji menüja bilemer. Ajisüka, asenokia aiben Tsüngrem leniba asüngdangtsü melen asenoki mulungba nung dang asenok mapatem inyaker. Tsüngremji asen madak kibur aser chuba, anungji asenok shisabolutsü mali, Pai asenok anüker, asenok len anir aser asenok moatsür. Asenok teinyaktsü mapa ajunga agi, Pai agütsüba takok aser temoatsü madak ochishia ketdang asütsübaji dang lir. Aji oda, asenok madak yimsüsürji Tsüngrem aser asenok Pa kübok ketdangsertem asünungji, asenok teinyaktsü mapa aser aotsüba lenmang ajak Pai asenok dang sayutsü. Aji oda, Pai agütsüba taküm, temang aser tanüla ajak madak ketdang asütsübaji asenok shilem aser asenok khuret. Pai asenok kibong nüngdak meteta lir. Pai asenok chinurtem kongi yoktsü meteta dang lir. Pai asenok nisung shia nem kinungtsü aser kinungbo asütsü tetemsü apuani agütsür. Asenoki Pa dak temulung lemtettsüla aser asen taküm aser kibong madak Tsüngremjiang yimsüsür südaktsütsüla. Israel nunger amaji Tsüngrem masü saka nisungang külemnüba, Tsüngrem masü nisung tenügang sangnüba aser Tsüngrem nem masü nisung nemang junger ta shidaktsünüba shisatsü aser tangatetba nungi asenok pilatsüla. Tsüngremji alima yimsüsür aser chuba meyirijang dang nungi tashi tuluba, kechiyong Pajibo chubatem madak Chuba. Alima chuba masü saka Kibuba Tsüngrem, shibai alima chubatem shimer aser atsüngdoker, Paji dang asenok madak yimsüsür südaktsüdi.

OLEMSABANG

KITA CHIR

~ S.Aosüngküm Ozüküm

(Iba Yimdangjem otsü ya Tir Yimyim aser Bookipedia nati ayongba toktep nung Tanabuba takok jenjang anguba liasü.)

Tapu - Ka

Kr. Yimtina Taküm Nükmen : Anüdoklen nisung ajaki meraküta reprangba yimti tobur tajung ka liasü, Iba yimti nung tangar lima nung manguba shiruru jendi lir aser süngjanglijanga tapu ajak talubusa angur. Kechiaser iba yimti nung takataiter aika alibayong par limaji jangratemtsüka aser temenungtsüka yangertet. Anungji raliwalirtemi künüamathi, amman sangwa methitemi senatua semdangba yimtiji iba yaa ka liasü. Anungji nüburtemi iba yimti dang "Anümai yimti" ta aja".

Iba ama jangratemtsü aketba yimti nungji rongsen madak kibur ano pajisa yimsüsür tajung ka liasü. Par kibong nung jabaso ka aser jala ka liasü, jala tenüng "Yimtina" tetezü iba Yimti nung naro ama sotetba naroküm agütsü. La tasodangyongi apetasong maket tetemjen jala ka ta yimer ajaki meteta liasü, yamaji la tain kuma aodang kanga ajemalu aser sempet tajung aketba aier chanu ka intetba ngua yimti nung aliba asangur aser kijung lanur ajak mulungjang lai puadok.Kechiaser la menürem jakden, sentsü tenenya aser bangkila agi azüazür liasü. Anungji yimer ajaki nükshia aliba aierlaji; asangur shibai pei kinungtsü asütsü agütsü ta ajaki teti bilem, kechiaser la tobur onsara ajungba agi tanur tain ajaki mapang shia bilemteta jembi. Yamaji kumtem süitema aodang laa arishi kum nung tain akümer asünung joko la den kibong kumnertemi senpet tapu jendi bener la asüngdangisa aru. Saka lai shinga dena temulungjang lapoka sensak masem mesüra hai ta langzüka mayu. Oda shiri mulungsoa senpetlep agütsüdir parnok ajak dang kanga pelara no ta shir yokli asü. Kodang item tatalokbatem lai ajangshi la mulungjang nung tiptem aser anisüngzük ka melii item indang bilemdangtsü tenzük. Yamaji tsüraburtemia la taküm yimya balaka kumogo ta ajitet, saka la den iba indang kecha mejembi.

Tapu - Ana

Shisa Tamajung Renlok : Kodang la asüngdangi asangurtem lar tsürabur ki tonga aru, tsüraburi item asangur ka dak danga mesaklok. Kechiaser par tebilemba ajak agi kibong tajung chir ka denang kibong kümdaktsütsü terenemba liasü. Anungji anepdang aonung shia lar tsüraburi tebur shinga danga hai ta melangzüksü mesüra medemer kumteta mayutsü ozüng agütsü. Oda parnok rongsen dak rangloker telemtetba tai agirdangashi asangurtem rongnung tashitemeteter, tarutsü nung ajaki meteta yimten lennir akümstüpur aika densema liasü. Saka tsüraburi "temeim nung masü, akhümket aser khonang nüngsang dak ranglokba agi parnok tebilemba khenyongi balala liasü. Yamajika masü asübo ajemalu aser tesüngjem asangur ka den kibong tajung kumteter alima nung jangratema liyonga aotsü lenmang sademasadema liasü. Reprangang tesasatsüka, Yimtinai rongsen kanga meima aküm, anungji la taküm nung rongsenji kibur kümdaktsü. Iba sülen lai aiben tsürabur senbong nungi miima sen agitet aser kechi inyaknür, kechi chiajemnür, ano kolenisa onür kecha tarentak makai la sünütsüsa alitsü tenzük; kechiaser la sen agi kodanga anüngaponga maliasü, yamaji taküm nung rongsen aika akanungji nungtak ajak nung timtem kecha melii periadang liasü, anungji la taküm tepiyong iba jenjang kasa nungjisa alitsü ama bilema anogotem süidaktsü aser senti mapang ajak amajok nung lalushibong, saka iba miim mapaji tsüraburi khenyongi memetet. Joko lai taküm dang nungi rongsenang temeimba aküm nungji; la shisatsü ajakji rongsen tsütsü kanga renlok aser odaodabo kakat shisatsü bushiba nung kodanga mesaaktettsüsa tekübok jenjangi alu. Kodang la shisaliok nung tamakok angu idangji lar tsürabur kanga jashiadok. Kechiaser iba kibong tebilemba ajak agi kechisarena ajunga nung par kibongsa tajungtiba asütsüla ta tetoktepba shisatsü agi sünga liasü. Oda tsüraburi yamaji bilemyongbo anogo ka nungi ka süitema aodang parnok tebilemba mataloktsüsa la shisatsü tamajunglen renlokjen renlok aser lai la taküm ali shi jangraba nem bendanga agüja jabujarilen temulung ajak agütsür nemzüksü tenzük. Saka lar tsüraburi la iba kangla nung asongoker mashilen jajaba khenyongi memetet, oda par jala tereprangtsü koda tobur tajung iba denji kasa la yimya tema telunglen ajak kasadang ta mulung lemtet lemteta liasü, anungji kidangi kisemer arur ajak den la ajungba shisanga jembi aru.Kodang lar tsüraburi la dak aliba yimyatemi memeteti la nung sanga jembi; idangji la mulungjang nung asüküma bilem aser ano tasüitshir mapa tamajung talila inyaklokli ta la taküm telunglen tesempatsü mapatem agi sünger liyonga ao. Kenü anogo la sen kanga nüngdaka aküm, anungji lai tsürabur senbong nungi sen agitettsü lenmang bushi, saka tebilembaji matalok, anungji lai kong nungi sen angutsü ta tasa balala atongdanga alidang; atangji la tobur ajungba aser wainshin aketba indang lar yimer ajaki meteta aliba ama, oda asangurtem dang masü kijung lanurtemia la kanga nükshir asünung; itaya aonung ka kijung lanur ka den Opong (Mobile Phone) nung jembi aser tena ajuruteptsü sentong yanglu.

Jembiba ama ajurutepta anogo aser mapang nungjisa lai la tebenjem taküm sempet ajak salateta iba kijung lanur ka nemji agütsü. Iba aonungji lai alima nung la kija alir ama bilem, saka tarutsü nung kechi ataloktsüar meshisadang. Iba aonung lai la mang nung pa kibur kümdaktsüba tepela tamaitü la nem senpetlep ka den sen aika amokja ashi, ni asoshi ibai pungmang ka amai lir, kechiyong na ama ajaki nükshiba aier kati, ni ama ka den shisa mulung ajemtsü tabo ni khenyongi meimla; anungji nai kü dak saklokba atema ni kanga pelar ta ashiba sülen, amman tajung salem shiteper mesenshinüseti menungratepa senshi. Kr.Yimtina iba aonung asentzü meseni zübazübaa anguba sen teka anatsü sünga amer lar ki atongdang; lanur sentep nung teti atenba ken ka tenshiyonga la takdang lapoka aiba angashia, tsüraburibo taküm temerük nung medemer pur den kazüa senzür arur ta bilemer mejanga oadok. Saka labo tebenjem taküm sempet yimdong nung lalushibonga nemzür shilangerba liasü, aji ta süaka tang tashi shingaia telunglen miim mapaji memetet.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

US Tir Donald Trump-i Nigeria ya 'CPC linük' ta sangdongogo



Nigeria Tir, Tinubu

US Tir, Donald Trump

November 01, 2025: Mapang talangka nungi Khristan melungtet telok aikati aser Khristan lenirtemi Nigeria nung yimsü temeden anema inyakba aser Khristantem jenti tepsetba atema Nigeria ya CPC list nung nung züngoktsü takhangba agüja aruba sülen Hokolbarnü US Tir, Donald Trump-i Nigeria ya 'CPC linük' ta sangdongogo.

Social media ajanga Trump-i Nigeria nung Khristantemi anogo shia timtem ajuruba metetdakja, "Nisung jenti tepsetba ya yimsü alia amanger Islamic teloktemi lir. Anungji ni Nigeria ya "COUNTRY OF PARTICULAR CONCERN" ta sangdonger, ta metetdaktüsügo.

US Tiri Nigeria ya Country of Particular Concern (CPC) ta sangdongba ajanga Nigeria nung Khristantem reshikangshiba osang alimai taliba meteta akümtsü aser Khristantem anema inyakba ajema akümtsü imlar.

Tamalen Nigeria ya CPC list nung züngoka liasü, ajisüaka 2021 küm taoba Tir Joe Biden-i ibaji agiena liasü.

Tang Trump-i Nigeria CPC sangdongba pelaa agizüka International Christian Concern (ICC) Tir, Shawn Wright-i, "Iba ama tongtimbang onük ka agizükba atema onok pelar. Iba ya ajanga Nigeria nung kibongtem aser Khristantem taküm jenjang tajungba akümtsü atema alima linüktemi inyaktüsü. Iba ya tatishitsü agia kasaji inyaktüsü atema lenirtem ajungmesotsü aser ozüng alema inyakertem ket nungi aika anisüngzük angutsü," ta metetdaktüsü.

Nigeria nung meimchir temeden jenjang aser yimsü temeden jenjang tamajungba dang akümer. Iba linük nung Boko Haram, ISWAP aser Fulani kiralongrartemi Khristantem maneni amaker, ajisüaka sorkari aibelenertem anema meinyaker.

Trump-i, alima nung Khristan

4,476 tepsetba den medemdangra Nigeria nungbo Khristan 3,100 dak tali tepsetogo, ta metetdaktüsü.

Trump-isa Rep. Riley Moore (R-WV) aser House Appropriations Committee chair, Rep. Tom Cole (R-OK) na dang Nigeria nung Khristan jenti tepsetba ya tangsa asadangang, ta tuyuogo.

Trump-i, "Nigeria aser linük aika nung nisung jenti tepsetba ya United States-i magizüktettsü," ta metetdaktüsü.

Hopta ishika tejaklen U.S. Congress-ia Tir dang Nigeria nung Khristan jenti tepsetba nokdangtsü atema inyaksangshitsü mepishia liasü.

2023 küm Nigeria nung Bola Tinubu Tir akümba mapang nungi tenzüka nisung 10,000 dak tali tepsetogo, noklang aika puer ogo aser nisung million 3 dak tali jenshiogo.

Taküm January ita nungi July ita tashi nunga Nigeria nung Khristan 7,000 dak tali tepsetogo, aser ibaji anogoshia Khristan 35 tepsetba den kasa lir.

October 5 nü Rep. Riley Moore-ia US Secretary of State Marco Rubio dang Nigeria ya Country of Particular Concern (CPC) nung züngoktsüla, ta mepishia liasü.

Moore-i X ajanga, "Nigeria nung Khristantemi asen Kibuba aser Kümtetdakba Yisu Khrista dak amangba atema reshikangshi ajangshir aser tepseter. Khristantem tepsetba ya anentsüla. Ibayongji ni @SecRubio dang Nigeria ya Country of Particular Concern ta sangdongtsü mepishir. Khrista nung asen aianu aser adianutem tepsetba ya nokdangtsü atema asenoki ketdangsüba tsütsü hadir ajak amshitsü nüngdak," ta metetdakja liasü.

Tawa interview ka nung jembidang Moore-i, alima nung Khristantem atema tesem tamajungtibaji Nigeria lir; 2022 küm October ita nungi 2023 küm

September ita tashi nung alima nung Khristantem tepsetba shilem 82 bo Nigeria nung liasü, ta metetdaktüsü.

"Tamangertem jenti tepsetba mapang nung United States-i mangu ama metoktsütsüla. Yimsü alia amangba Islamic teloktemi Khristantem anema inyakba tebilemtsü onük ya asenoki agizüktüsüla. Khrista nung asen aianu aser adianutem kümzüktüsü atema United States-i inyaktüsüla aser Nigeria ya Country of Particular Concern ta sangdongtsüla. Tekeraba nung Nigeria ya CPC linük ta sangdongtsü atema ni Secretary Rubio dang mepishir," ta Moore-i metetdakja liasü.

Senator Ted Cruz (R-TX)-ia Nigeria nung Islamic telok balalai Khristantem amakba atema Nigeria nung ketdangsertem anema inyaktüsü atema ozüng ka benoka liasü.

Taoba ita tomlen US nung Khristan lenir 30 dak temaia shidi ka ajanga US Tir dang Nigeria nung yimsü temeden anema inyakba aser Khristan jenti tepsetba atema iba linük ya CPC list nung züngoktsü atema U.S. Department of State dang tuyuang, ta mepishia liasü.

CPC list ya 1999 küm tenzüka liasü saka 2020 küm tashi Nigeria ya CPC nung mezüngoki liasü. Iba sülen 2021 küm Nigeria ya CPC list nungi agien, ajisüaka tang tashi iba linük nung Khristantem atema tensa tajungba makümer.

Nigeria Middle Belt region nung aliba Benue state nungbo taküm küm tenzüker tang tashi nung Khristan 1,000 jungnüa tepsetogo, ta shidi nungji shia lir.

Khristan lenirtem jagisa "Fulani jihadists" ya Entity of Particular Concern (EPC) nung züngoktsüla, ta temepishiba agüja liasü.

Khristan lenirtemi Trump dang, 2009 küm nungi tenzüka Nigeria nung Islamic kiralongrartemi Khristan 50,000 dak tali tepsetogo, ta metetdakja liasü.

ANOGO ABEN TSÜNGREM DEN

Khrista Mulungsentsü Adenba

"Shibai Pa temulung metet ? Saka asenok dak Khrista temulung lir." I Korint 2:16.

Ibai tamangertem nem tekümtet sempet agütsüba indang tatsütiba nung ashiba lir. Kechiaser aikati Khrista ajanga Tsüngremi moatsüba angatettsü makoker. Aiben Tsüngremi shimtetba aser nisungi shimtetbaji balala asür. Asen tsütsü nungi dang ngujemtsübaji meimchir yimya; Tsüngremi mulungba mapa tulu lir ta aseni mebilemer. Tanela Temeshi aruba ajanga Tejen Lai mapang dang nungi tali tamangertem nem Tsüngremi tali agütsür. Yisu tasü nungi shia arur kotaki atuba ajanga Tsüngremi Tanela Temeshi asenok dangi yok.

Pauli ozüng agüja ashibaji tajangshiba nung amendaker masü saka shia aruba Khrista den lungjemba nungi ashi.Tanela Temeshi asazüka magütsü nung Khrista-i nübu lemdanga agütsütsü makok. Asenok dak Khrista-i mulungba melira asenok Pa meyong masü ta Pauli zülu. Asenok Khrista kar. Asenok dak taküm aliba nübu ka alir, shiba shisatsü aser temetetba temaba nungi lir.

Pa shisatsü, temeshiba, temeshitetba, alangzükba Pa mulung nung aliba, asenok meyong lir. Khristai pa mulung den mejembitsü asü ? Atangji masü! Tebilemtsüji, asenoki o mesüra Tanela Temeshi dang mangar. Khristai asenok den jembir aser angatsü ata alir.

Samaritan's Purse-i Jamaica nung yipru agi kongshirtem nem teyari agütsür



November 01, 2025: 'Melissa' ta ajaba yipru mopung tesashi agi Jamaica kanga mejungi kongshiba sülen Khristan melungtet telok Samaritan's Purse-i Disaster Assistance Response Team (DART) ka asetkong linük jagi yoka iba yipru agi kongshiba nüburtem nem teyari agütsüdar.

Iba yipru lendong nung tang tashi nung nisung 19 asüba jangjaogo aser kiojen jenti raksatsüogo. Tang Jamaica asetkong tesem aika nung light mali, tzü temerük mali aser tesem kar nungbo chiyungtsü agi anünger.

Iba region nung yipru tesashibaji Hurricane Melissa ya lir; kasa yipru ajanga Haiti nunga nisung 30 süogo.

Samaritan's Purse-i North Carolina nungi DART team ka den teyari oset balala Jamaica-i yokogo aser ano maneni teyari yoktsü. Teyari osettem rongnung tzü filtration systems, solar lights aser kisüjensüba osettsüset densema lir.

Samaritan's Purse Tir aser sayutsüngir, Franklin Graham-i, "Hurricane Melissa agi Jamaica kanga mejungi kongshiba sülen kibong meyirjang aikati rongdak

teyari nüngdaka lir. Nisung aika asüba atema onok melung raksar aser mangyim jashi lemsateper," ta metetdaktüsü.

Paisa, "Iba yipru agi tzüküm matongdang yongi onok team-i teyari agütsütsü renema liasü aser tang onoki teyari oset balala bener apusor. Yimlibilema Jamaica nung alirtem atema sarasademjang aser Yisu tenüng nung teyari agütsüba mapa inyaker ozü staff tem atema sarasademjang," ta metetdaktüsü.

Tzü water filtration systems ji ajanga nisung 10,000 dak tali nem tzü temerük agütsütettsü, iba dak alia parnoki kisüjensüba oset balala agütsütsü.

Iba yipru ajanga kiojen jenti raksaja liasü ibayongji mezüngbo iba asetkong jagi teyari oset balala bener otsütsü tasak liasü, ajisüaka yipru süiba sülen Kingston's airport bo amshiteter, ibayongji Samaritan's Purse-i tayimtsü ajanga teyari balala bener otsüogo.

Samaritan's Purse-i Jamaican Ministry of Health aser local Arogo 250 den amalitepa yipru agi kongshiba nüburtem nem teyari agütsütsü.

AO OSHI ANGAZÜKDAK:**TANÜ ANGAZÜKTSÜBA OJANG****Tonglong**

(n) ninang aser meja techanu (grub)

* Ninang tonglong sen tasak kümogo.

Tonglu

(n) tenarong nung naro anokdak tapok (pierced earlobe)

* Akhi mapangbo tetsür tebur ajak tonglu keter liasü.



Tir Yimyim

OLONG PAITEP # 7317

1		2				3		4		5
				6						
	7		8							
9					10			11	12	
			13		14	15				
16					17			18		
				19	20					
21		22								23
24										

TIPIEN

1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tasangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. tatsü - (3)
12. Tebur kidong aser zünga kasa tsüingda jatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7316 TELANGZÜBA**TIPIEN :**

1. Kazük, 5. Tai, 6. Asep, 9. Tain, 11. Ken, 12. Langkutem, 13. Ber, 14. Adok, 16. Kain, 18. Isü, 19. Telok.

LANGTSÜNGLEN :

2. Ama, 3. Mit, 4. Chitem, 7. Suwar, 8. Pungzü, 10. Aputak, 11. Kechi, 12. Lenden, 15. Kin, 17. Nao.

NAI-A YA METETTER

India ajungalen tetsürtem asoshi agiba campaign 'Swasth Nari, Sashakt Parivar Abhiyaan' (SNSPA) ajanga Guinness World Records asem ngutetogo. Iba campaign nung ita ka tsüingda healthcare platform nung nisung teimtiba (3.21 crore) register asüba, hopta ka tsüingda breast cancer screening online atema nisung teimtiba (9.94 lakh) tenüing agütsüba aser hopta ka tsüingda vital signs screening online atema nisung teimtibaji (1.25 lakh) tenüing agütsüba otsütem yanglutetogo.

Iba campaign ya India kübok district shia nung agi aser iba nung health camps 19.7 lakh ayonga agi aser nisung crore 11 temai shilem agi ta Union Health Ministry-i metetdaksüogo.

Sorkari Shillong ajungalen CCTVs & street lights enoktsü

Shillong, November 1, 2025

(Agencies): Shillong nung safety aser security atema Meghalaya sorkari CCTV cameras aser street lights enoktsü ta Chief Minister Conrad Sangma-i metetdaksüogo.

Rangbah Shnong aser Greater Shillong Planning Area nungi tanishirtem den senden ka amenba sülen CM Conrad-i iba osang metetdaksü.

Iba senden nung lokti lennirtemi state yimtiba aser temeket tajungba kümdaktsütsü indang tebilemtsütem lemsatepa

liasü.

Senden nung CCTV installation, street lighting, solid & liquid waste management aser kiyong balala tobur jungdaksütsü onüktem benoka lemsatepa liasü.

Lokti lennirtemi ki aser boundary walls, tanur aser teintet rogotem atema parks & recreational spaces amala local beautification projects inyaktüsü Chief Minister-i ayongzüük.

Sorkari kija aser teloktem den yaritepa gari lenmang temesü khuret ajema

kümdaktsütsü atema kiyong balala nung parking facilities yanglutsü mulunga lir ta paisa ashi.

"Ni lokti lennir ajak dang sorkar den külemi teka amteper maneni inyaka aotsü ayongzüker. Shillong temerükba, tajungba kümdaktsütsü atema asenok ajak yaritepdi" ta Conrad-isa ashi.

Iba senden nungsa CM Conrad-i kiyong 14 nem Scale Up Fund for the My City Campaign agüja liasü.

Manipur nung kaketshir telok kati Sangai Festival aitsür

Imphal, November 1, 2025

(Agencies): Manipur sorkari Sangai Festival amungtsü lemtetba aitsür ta Internally Displaced Persons Students' Welfare Association (IDPSWA)-i metetdaksüogo.

Manipur nung nisung meyrjang aika pei talidak toktsür humanitarian tebilemtsü tulu ka ajurua lia iba benjung amungba ya khenyongi meputep ta IDPSWA-i ashir.

"Nisung meyrjang aika rongsenketzüing tia raksar aliba mapang ka tourism festival ka ayonga amungba ya kechi tangatetba lir. Pei talidak toktsür aoertem taküm liyonga aotsü atema relief camps dak dang teimla yur alir" ta parnoki metetdaksü.

"Pei talidak toktsür aoertem

mapa mangu yutsür kechi rongsenketzüing ajangzüksü indang jembir. Pei talidak toktsür aoertem kiojen mali aser taküm liyonga aotsü atema community kitchens dak dang teimla yua lir" ta IDPSWA-isa ashi.

Manipur nung telemsa adoker aser pei talidak melitetsüsa tensa ka lia sorkari yimjung aser tourism ajungkettsü atema iba benjung amunger ta ashiba aitsür. Ochi aser putepshiba melii tourism ji tazüingla ta parnokisa ashi.

Churachandpur Meitei United Committee, Committee on Protection of Meitei Victims, Moreh (COPMeV), aser tanga civil society organizations-i iba benjung magizükba pusema nungiter ta

kaketshir telokisa ashi.

"IDPs senzuka yutsüba aitsür. Pei sensotem relief camps nung yutsür benjungbentsü amungba ajanga osang tai prokshir" ta parnokisa ashi.

"Manipur sorkari tongtipang tebilemtsütem atema inyaktüsü aser yimjung yanglutsü, olemteptsü aser pei talidak toktsür aoertem tanaben meyipa aotsü maparen inyaktüsü. Maneni, Sangai Festival nung artists, performers, tourists aser festival partners-i iba ama meimchir tebilemtsü ajurua lia benjung amungba ya shisadangtsü ayongzüker" ta IDPSWA convenor Romhayom Premchandia-i zuluba shidi nung shia lir.

Sarli-Ladakeno nung ochimashir merenshitsu: Arunachal CM

Itanagar, November 1, 2025

(Agencies): East Kameng district kübok Frontier Highway project nung Sarli-Lada stretch atema senotsü temenok agütsüba nung tim masü inyakerkem merenshitsu ta Arunachal Pradesh Chief Minister Pema Khandu-i ashi.

"State sorkari iba ken o bushisüingdangtsü atema High-Level Committee ka tentetogo aser parnoki preliminary report

agütsüogo" ta CM Khandu-i ashi.

"Mezüing nung onoki committee dang iba tim masüba maparen nung shilem agiba ketdangtsür ajak mapa nungi anentsütsü tetuyuba agütsüogo. Anogo ka ana tsüingda suspension orders agütsütsü" ta pai ashi.

"Arunachal Pradesh sorkari ochimashi atema zero-tolerance policy lir. Ozü sorkari tashishitsu

melii aser ajak dendaktsür inyaksangshir. Kechi jenjang nung südir süaka ochimashi magizüktsü" ta paisa metetdaksü.

"Frontier Highway project kübok iba section nung ali melen temenok agütsüba nung ken o aika liasü. Iba jagi onoki bushisüingdang asütsü tetuyuba agütsü aser aibelenertem ozüing lateta aliba ama temerenshi tulu alitsü" ta CM Khandu-isa ashi.



Mizoram sorkari October 31, 2025 nü Tobacco-Free Youth Campaign 3.0 tenzükdang agiba noksa ka angur. Aizawl nung Health and Family Welfare Minister Lalrinpuii-i campaign tenzüksü aser iba ya sorkari lanurtem tobacco dak sendakba lendong nungi kümzüka ayutsü nükjidong yur agir.

Hassan-i Tanzania Tir election akokba sangdongogo



Samia Suluhu Hassan

Dodoma, Yimpoksüi/November 1 (Agencies):

Tanzania indang electoral commission-i Honibarnü sangdong ka ajanga, Tir Samia Suluhu Hassan-i vote shilem 98 ngua election akokba sangdongogo. Taküm election agiba mapang Tanzania kübok tesem balala nung azütokshi lendong tulu adokogo.

Iba election akokba sülen Hassan-i maneni nütsünyongsük million 68 aliba iba Africa linük ya ano küm pongu yimsü asütsü. 2021 küm taoba Tir asüba sülen Hassan-i pa melena liasü.

Bodhbrnü Tir aser parliament election agiba mapang longkak aitertemi Hassan indang banner tem shisatsü aser sorkar meyong kitem nung mi senokja liasü. Kasa mapang nung police-ia tear gas aser injang khaloktsüba tenük kuli agütsürtemi

metetdaksüogo.

Electoral commission-i election nung Hassan anema nokdaker tongtibatiba ana election nung metoktepdaktsüba atema longkak aitertem mit adoker.

Tanzania nung opposition party tongtibai Hokolbarnü ashiba agi, longkak aitba mapang nisung noklang aika tepsetogo, ajisiüaka .N. human rights office-i ashiba agi, iba lendong mapang yimti asem nung nisung 10 tepseta liasü.

Sorkaria opposition-i nisung noklang aika asü ta sangdongba ya tai ta ashiba den, meimchir temeden anema inyaksangshiba atema parnoki aitsüba magizük. Electoral commission-i ashiba agi, Hassan-i vote million 31.9 mesüra 97.66% ngua liasü. Taküm election nung linük nung züngoksema aliba voter million 37.6 nungi shilem 87-i vote agüja liasü.

Tenük kuli agütsürtemi ashiba agi, election agiba anogo nüburtem aikabo vote agütsüi maru aser polling station karbo nüburtemi longkak aitba ajanga minpronga liasü.

Tanzania nung ketdangsürtemi asem aonung tashi linük ajunga nung curfew benokba den internet tenokdangba agütsüogo.

Foreign Affairs Minister Mahmoud Thabit Kombo-i Hokolbarnü sangdong ka ajanga, security service temi tashi alia amshi ta ashiba magizük aser ashiba agi, tesem kar nung dang ozüing anema inyaksangshirtemi timtem agüja liasü.

U.N. Secretary-General Antonio Guterres indang otongdaria, sepaitemi tashi alia amshi ta aitsüba aser nisung taküm samaba ken o kanga junga bushisiüangdangtsü ayongzükogo.

2021 küm John Magufuli melena Tir akümbe sülen arishi küm 65 tain Hassan ya ajaki tenüngsang aruogo, saka tawa nisung ishika apuba aser opponent tem pur aoba sülen la ya opposition party aser activists temi aija arudar.

Lai iba taitsüba magizüki arudar aser taoba küm lai ashiba agi, nisungtem pur aoba dak sendakba nung ken o bushisiüngdangtsü atema pai tetuyuba agütsüogo, ajisiüaka tang tashi iba bushisiüngdang ajanga ngutetba official osang agüja mali.

Turkey nung obendangeri nisung 11 taküm tepeyong tepuokdak ayutsü obendang agütsü

Istanbul, Yimpoksüi/November 1 (Agencies):

Turkey nung okadak kati, taküm January ita Bolu tenem nung ski resort ka nung hotel ka nung mi adoka nisung 78 asüba dak sendakba nung nisung 11 taküm tepeyong tepuokdak ayutsü obendang agütsüogo.

Hokolbarnü tepuokdak ayutsü obendang agütsürtem rongnung Grand Kartal Hotel kibur Halit Ergul densema lir. Iba hotel ya Istanbul nungi km 295 pilar Kartalkaya ski resort nung amenoka lir, ta state meyong broadcaster TRT Haber-i metetdaksü.

Court-isa, Ergul kinungtsü Emine Ergul aser par jala Elif Aras aser Ceyda Hacibekiroglu nungera tepuokdak ayutsü obendang agütsüogo. Parnok ajak ya hotel indang management team nung densema liasü.

Taküm January 21 nü Grand Kartal hotel restaurant nung mi adok aser iba ajanga 12 ben

tashi atongtepa sür aliba hotel nung mi jangru tenzük. Iba mapang hotel nung nisung 238 anena liasü.

Mi lendong nung asür 78 rongnung tanura 34 densema liasü. School holiday mapang Ankara aser Istanbul nungi kobongtem aika Bolu tenemi ski asüi aoba mapang iba lendong ya ataloka liasü.

Lendong nungsa nisung 137 yiru. Mi adokba sülen hotel nung anena alirtem taoksa nung ayaterem nung kichiba nungi pongzüka alutsüsa aküm aser iba mapang nisung aika yirua liasü.

Hokolbarnü tepuokdak ayutsü obendang agütsürtem rongnung hotel indang general manager, Emir Aras aser Bolu indang deputy mayor Sedat Gulener aser hotel tanga ka indang director Ahmet Demir nungera densema lir. Tenaprongla ya Grand Kartal achaayangba company indang board of directors nung dena lir. Kasa mapang nung iba ken

o nung defendants 32 lir aser parnok 20 pre-trial detention nung lir ta TRT-i metetdaksü. Tanungba defendant tem ya kodang okadak nokdaksü iba indang osang tejangja memetet.

Iba lendong atalokba sülen Turkey ajunga nung nüburtem kanga meit adok. Lendong nungi jenbortemi lendong atalokba mapa fire alarm dena magütsü aser parnok mokozi agi sünga aliba corridor tem süia aotsüsa aküm ta ashiba sülen hotel nung anenertem kümzüka toktsütsü atema jenjang agiba dak sendakba nung ken o ashishia liasü.

Iba sülen ketdangsürtemi nisung teku apu aser ken o bushisiüngdangtsü atema sorkari prosecutor trok shima liasü.

Lendong atalokba sülen Interior Minister Ali Yerlikaya-i, aibelena alirtem metoktsütsü ta ashi. Turkey tir Recep Tayyip Erdogan-ia linük ajunga anogo ka mang ayimtsü sangdonga liasü.

Melungnen O

June 1920 - 23 October 2025

Onoki teti meima aliba tsürabur obala **Rongsentemjen Jamir** (Chuchuyimlang Village) arishi küm 106 tashi Tsüngremi taochi nung toktsür 23th October 2025 nung akümi tembangba mapang kija, kibong, kiyonger yimden, arogo, purmedemer yimer lokti balala ana aser talang nungi shirnokisa onok den sarasadem nübo, rongsen aser shisatsü agi yaritepogo nenok ajak dang kanga pelaba metetdaksür.

Nenok mapa tajung onoki kodanga mamatsü. Tematiba Tsüngremi nenok ajak moajangma ta ozü tamang sarasadem.

Temeim Chirmer, Semehisemur, Anükapang & Kinugertem

OFFICE OF THE
AOYIM VILLAGE COUNCIL

AOYIM Village
CHUMOUKEDIMA – 797103, Nagaland
Govt. Regd. No.GAB-13/17/83 (Vo I-IV) 8th Jan.92

AVC/GEN-1/2025/09

Date 31/10/2025

METETDAKTSÜR

Aoyim Baptist Arogo Silver Jubilee amungtsü atema renemshiba mapang yimtsüng telongtet nung aliba ali kibur ajak dang pei ali nung arem, süngsem aser nüngdak makaba tsünüsenpongtsütem ajak merektetsü asoshi Aoyim Village Council-i metetdaksür.

Benjung amungba mapang yimtsüng merek mereka aser tebor junga toktsütsü asoshi iba inyakyim ya benoker. Merekmeju ya November 15, 2025 nü tashi nungbo tembanga inyaktsüla.

Iba tongtiban sentong takok ngua amungtsü atema nenok ajaki teka amteper inyaktsü mepeshir.

By Order:-
AOYIM VILLAGE COUNCIL

Venezuela amaktsü kecha sentong mali: Trump

Washington, Yimpoksüi/November 1 (Agencies):

United States Tir Donald Trump-i, Venezuela amaktsü atema kecha sentong mali ta shiogo, koba pai iba ita tetenzüklen jembiba den meputep ama reprangteter.

US-i, fighter jet, warship tem aser sepaitem aika Caribbean-i yokogo aser alima nung warship tulutiba, aircraft carrier USS Gerald R Ford, tang Venezuelan tzükümleni odar.

Hokolbarnü Air Force One nungi osangbenertem den sensaksemba mapang, media osang ajanga nai Venezuela amaktsü sentong lir ta ashiba ya shitak asü tai ta asüngdangdang Trump-i iba osangji shitak masü ta shiogo.

US Secretary of State Marco Rubio-ia kasa telangzüba agütsüogo. Miami Herald nung ocet ka nung US nunger sepaitem Venezuela amaktsü renemdar ta adoktsüba dak sendakba nung telangzüba agütsüba mapang Marco-i, "nenok indang source yagi osang tai zülutsü atema nenok ashioktsüogo," ta ashi.

Trump-i Hokolbarnü telangzüba agütsüba ya pai iba ita tetenzüklen Venezuela dak sendakba nung sentong ana tashi nung jembir aliba den meputep.

US Tir-i taoba hopta ashiba agi, inyakyim tejakleni bener aotsü atema rara sangdongtsü nüngdak madoktsü. "Onoki linüki temesepba mozü bener arurtem dang tepsettsü," ta pai ashi.

"Temesepba mozü ya tang ali ajanga abener anungji taruba jenjangi item anema agitsü," ta pai shisem.

US military-i, September ita nungi Caribbean aser eastern Pacific nung rongtem maka arudar aser iba mapang nisung 62 tepsetogo aser semi-submersible ka densema rong 14 raksatsüogo.

Trump administration-i ashiba agi, parnoki temesepba mozü shibelenertem amaker, saka tang tashi nung kuli tejangja agüja mali.

United Nations High Commissioner for Human Rights Volker Turk-i, item rongtem amakba aitsüogo aser nisung aika tepsetba ya agizüktsü makoktsü ta shiogo.

Rohan Bopanna asaya nungi anisüngzükba sangdongogo

Yimpoksüi/November 1, 2025 (Agencies): India nunger nüngtugu lawn tennis tarep asayar aser Grand Slama ana koker alisang Rohan Bopanna-i Honibarnü (November 1) pa professional tennis asaya nungi anisüngzükba sangdongogo.

Küm 20 asayaba sülen pa tang asaya nungi anisüngzüksü telemtetba agiogo. Pa tatemsa Paris masters 1000 nung Alexander Bublik den külemi asayaogo.

Bopanna-i sangdong ka ajanga pa asaya nungi anisüngzüker saka iba ya tatembang masü ta shia liasü.

"Nü taküm nem tetezü agütsüba mapa ka nai koda toktsütsü?" ta Bopanna-i shia pa asaya nungi officially anenba sangdongogo.

Bopanna ya alima nung number 1 jenjang tongtetba asayar rongnung tambusang küma otsü tasen ka yangluogo. Pai iba alizüng ya taoba küm arishi küm 43buba nung

tongteta liasü. Iba masüidang pa ya Open Era nung Grand Slam ka akokba asayar tambusang aküm. Pai Matthew Ebden den Australian Open tebur tarep asaya koka iba otsü tasen yanglu.

Bopanna-i ashiba agi, pa indang career ya Coorg jila nungi tenzuka liasü. "Kü service tashi taitba kümdaktsütsü atema süng asoba nungi stamina tajungba kümdaktsütsü atema coffee lu nung jogging aoba aser court teraksa nungi alima nung arena tulutibatam nung asayaba ya tamamangtsüka bilemer," ta pai ashi.

Arishi küm 44 tain asayar, shiba India nunger rong nungi ATP circuit nung ajak dang nungi tajungtiba asaya aruogo, pai pa taküm yanglushitsüba atema tennis nem tenüsang agütsü. "iba asaya yagi kü nem ni samar alidang timla agütsü, ni raksar alidang tashi agütsü aser alimai kü dak tamang makatetdang tamang katettsü teyari agüja liasü," ta pai ashi.

Bopanna-isa, par kibong aser talisa pa kinungsü Supriya aser jala Tridha na dang kanga pelaba lemsatep, aser tena ya pa tashi aser tenati pa ajungmesor ta ashi. Paisa, India tenüng nungi asayaba ya pa asoshi pa taküm nung tetushi tulutiba liasü, ta ashi.

"Ni asaya nungi anentsü akok, saka ni tennis asaya den tesendaktep tembanger masü," ta pai shisem.

Pai mezüngbuba Grand Slam ya 2017 küm Gabriela Dabrowski den külemi akok. 2023 küm pai Ebden den Indian Wells ATP Masters 1000 koka, Masters 1000 title ka abenba asayar tambusang aküm. Taoba küm tenatisa Miami Open koka ano otsü tasen yanglushi.

Olympic nung Bopanna aser Sania Mirza na tarep temeyoktep asaya nung bronze medal atema asaya, saka tenati Czech team nung Lucie Hradecká aser Radek Štěpánek na mekokteti pezübuba nung tembang.

Capt Kenguruse asayamung: Dimapur SC SF-i iogo

Kohima, Yimpoksüi/November 1 (TYO): IG Stadium, Kohima nung Honibarnü 9buba Captain Kenguruse MVC Memorial Football Tournament nung Dimapur Sporting Club-i asaya koka semifinal tongtetogo.

Quarter final asaya pezübuba asayaba mapang Dimapur SC-i, goal 2 agi Mavericks FC (Mon) koka liasü.

Asaya nung goal anaprongla ya asaya mezüngbuba shilem nung idaktsü. Merensang-i minute 27buba nung mezüngbuba goal aser Katoho-i minute 35buba nung tanabuba goal idakja liasü.

November 3 nü Semifinal

asaya:

- Langsa Hill FC vs Headhunters FC @10am
- Lushe FC Phek vs Dimapur Sporting Club @12Noon.

Paris Masters: Jannik Sinner semifinas-i iogo



Yimpoksüi/November 1, 2025 (Agencies): Paris Masters quarter-finals nung Jannik Sinner-i Ben Shelton koka pa world number one asayar akümtsü ana nung lir. Pa semifinal nung taoba küm iba asayamunger koker alisang Alexander Zverev den asayatsü.

Hokolbarnü quarter asaya nung Italy nunger asayar yagi 6-3, 6-3 agi Shelton akok aser pa Zverev den taruba asaya asayatsü, shibai match point ana tashi kümzüka Daniil Medvedev 2-6, 6-3, 7-6 (7/5) agi kokogo.

Carlos Alcaraz tanabuba round nung tsüker aliba mapang Sinner temaba jenjangi atutsü atema meranga asayadar aser pai indoor hard court nung asaya 24buba atonga kokogo. La Defense Arena nung pai iba asayamung kokra pai Alcaraz ajateta temaba jenjangi atutsü.

"Ni tangbo ranking indang mebilemer. Ni koma asayar iba dak ajak keta lir. Anogo ka nungi anogo ka ta asaya aoer aser anogoshia asaya tasakba tasakba ta ajangshia aoer," ta Sinner-i ashi.

2023 küm Shanghai nung mezüng asayaba mapang tamakok anguba sülen Sinner-i asaya tenet atonga Shelton kokogo.

Arishi küm 24 tain asayar ya taküm asayamung pezübuba akoktsü merangdar. Pai taküm Vienna Open trophy, Australian

Open, Wimbledon, aser China Open kokogo. Sinner aser Zverev ya taoba asaya asemprongla Sinner-i koker lir.

Grand Slam pezü koker alisang yagi mezüngbuba set minute 34 nung dang akok. Tanabuba set nunga Sinner 3-1 agi tejakdang sür asaya tenzük, ajisüaka Shelton-i meyiper serve ka break süa liasü. Iba sülen game tibuba nung Sinner-i ano Shelton indang serve ka break asü aser asaya koka Masters semi-final 13buba tongtetogo.

Tanga asaya ka nung third seed Zverev-i kanga meranga asayar taoba mapang world number one asayar Medvedev kokogo. Mezüngbuba set bo Medvedev-i ayong ayonga akok, saka tanabuba set nungbo Zverev-ia toktepa asayateta decider asayatsü aküm. Tasembuba set nung Russia nunger asayar ya 5-4 agi tejakdang küma asaya akoktsü ana nung liasü, saka Zverev-i pa nokdangteta tie-break asayatsüsa aküm, koba Zverev-i koka liasü.

Kasa asayamung nungsa Alexander Bublik-i, 6-7 (5/7), 6-4, 7-5 agi Alex de Minaur koka tang mezüngbuba Masters 1000 semi-final ka tongtetogo. Maneni Auger-Aliassime-ia Shanghai Masters champion Vacherot 6-2, 6-2 agi koka Bublik den semifinal asayatsü jangaogo.

Genoa aser head coach Patrick Vieira na pilaogo

Yimpoksüi/November 1, 2025 (Agencies): Serie A club Genoa-i France nunger taoba mapang nüngtugu asayar Patrick Vieira coach mapa nungi anentsüogo. Genoa pur tang league table bonglang nung aliba mapang pa mapa nungi anentsüogo.

Sassuolo den taruba asaya atema Roberto Murgita aser Domenico Criscito na joint interim manager asütsü shimogo. Parnok asaya 9 tashi khen danga takok monguteti asaya arudar.

"Genoa CFC-i, Patrick Vieira ya joko First Team indang coach

masü ta sangdonger," ta club sangdong ajanga metetdaksü.

"Club nung inyakba mapang süokia inyakba aser professionalism sayuba atema Company-i technician aser pa indang staff tem dang kanga pelaba lemsatepogo, aser parnok career takok nung aotsü imlaja atar," ta kasa sangdong ajanga metetdaksü.

"First Team len anitsü atema interim basis nung coach Roberto Murgita aser coach Domenico Criscito na nem nongloktsüogo," ta club-isa ashi.

Vieira ya France team nungi World Cup akokba asayar ka

liasü, shiba taoba küm Genoa pur relegation zone-i point ka agi dang mai aliba mapang Alberto Gilardino mapa nungi anentsüba sülen shima liasü. Pa lenisüba nung Genoa pur taoba season 13buba nung tembang aser pa den ano küm ana atema tenangzüktepba yanglushia liasü.

Ajisüaka Genoa pur taoba asaya teku nung trok tashi nung tamakok anguba sülen pa mapa nungi anentsüogo. Juventus nung Igor Tudor melen Luciano Spalletti shimba sülen Seria A nung iba hopta coach anabuba mapa nungi anentsüogo.

Punjab FC-i Nigeria nunger Striker Nsungusi Effiong alizükogo

Yimpoksüi/November 1, 2025 (Agencies): Punjab FC-i Honibarnü Nigeria nunger centre-forward Nsungusi Jnr Effiong den tenangzüktepba ka yangluogo. Arishi küm 25 tain asayar shiba AIFF Super Cup 2025 atema Goa nung oa squad den indang indanga denogo, pai club den küm ka atema tenangzüktepba yangluogo.

Pa tesüsa Romania club FC UTA Arad nungi asaya liasü.

Punjab FC pur taküm takok timba ngua aotsü nükjidong yur asayaba mapang Nsungusi anisemba ajanga parnok nem teyari tulu agütsütsü, shiba ano ajen ajungba dang masü saka tajangshiba aika bena aliba asayar ka lir.

Effiong ya pa indang career Ghana nung International Allies nung tenzük aser iba sülen Europe-i ao. Pa Danish club HB Koge nungi season asem asaya. Iba club nungi asayaba



mapang pai asaya 58 nung goal 11 idakja liasü.

Iba sülen pa Central Asian league tem nung asaya senzü. Pa mezüng 2023 season nung Kazakhstan Premier League nung FC Atyrau-i loan nung ao, kong pai asaya 25 nung goal tenet idakja liasü. Pa 2024-25 season nung Uzbekistan Super League nung Neftchi Fergana nungi asayaogo. Pai asaya 24 nung goal tenet idakja liasü.

"Punjab FC nung adenba ya

takok angutsü atema aden. Ni attacking tapu balaka asayatsü atema aru. Ni pressure mapang tajungba asayateter aser fan tem matsüngda asayatsü matateter. Goal tem atema renema liang, kechiyong ni team tia melenshitsütsü atema idaki aru," ta pai ashi.

Effiong alizükba indang jembiba mapang, "Effiong dak onoki aginüba ajak keta lir. Iba ya aritepa agiba telemtetba ka masü, saka kanga junga sentong yanglur tajangshiba aika bena aliba goal idaktsür ka anisemtsü atema agiba lir. Pai onok asayaba jenjang ajungkettsütsü imlar," ta Punjab FC, Technical Director Nikolaos Topoliati-i ashi.

Arishi küm 25 tain asayar ya Goa nung squad den denogo aser pa tangsa tang asayatettsü, aser pai jembiba ama inyakteter minyakteter aji ajak yongyatepa repranga atatsü.

BILEMDANGANG

"Maongkaji mapa tasak amato arur, anungji aikati magizüker."